

Shin Yii mahu emas taijiquan

PALEMBANG - Atlet wusyu elit, Ng Shin Yii percaya dia mampu menjadi penyumbang pingat emas negara pada temasya Sukan Universiti ASEAN 2014 (AUG 2014) meskipun bakal berdepan saingan sengit daripada peserta tuan rumah.

Penuntut Ijazah Sarjana Muda Kewangan di Universiti Putra Malaysia (UPM) itu memberitahu, dia berhasrat untuk menggantikan pingat perak yang diraih dalam acara taijiquan dua tahun lalu kepada pencapaian lebih baik apabila beraksi di Pusat Promosi Sriwijaya.

“Ini penyertaan kedua saya pada AUG dan sudah tentu saya mahu mengejar matlamat saya di sini untuk meraih pingat emas dalam acara taijiquan.

“Dua tahun lalu saya tewas kepada Lindswell Kwok dari Indonesia, walaupun sukar kerana saya mungkin akan bertemu dia semula di halamannya sendiri tetapi saya akan cuba mengatasinya dia.

“Dua tahun lalu saya mendapat perak jadi saya akan cuba sedaya upaya untuk memperbaiki pencapaian itu pada AUG kedua saya kali ini,” kata atlet berusia 25 tahun itu, yang juga akan berpasangan dengan Phoon Eyin dalam acara duilian.

Katanya, persiapannya untuk ke Palembang tidak pernah terhenti sejak menyertai Kejohanan Dunia Oktober lalu.

“Selepas kejohanan itu saya hanya ada masa dua minggu untuk buat persiapan dan lebih fokus untuk berdepan kejohanan ini.

“Pada Kejohanan Dunia itu saya meraih dua perak dan satu gangsa, acara taijiquan saya tewas kepada Lindswell jadi saya harap kali ini saya mampu mengubati kekecewaan itu,” katanya. - UTUSAN



NG Shin Yii meletakkan sasaran untuk memenangi emas taijiquan setelah hanya meraih perak di temasya AUG di Laos dua tahun lalu.